

Et Schpennke, Deel een

Von Heinz Cremers

Vröher, janz vröher, also noch dovüür, hant die Mensche,
als die noch wild woere, erutjevonge, dat man Füer maake kues,
wenn man twie bestemme Steen an-neen schlooch.

Dobee moos man noch jet drüsch Heu av sue-jet draandon,
e bisske bloase on dann brennet dat op enns wie jeck.....

.....wenn man Jlöck haad.

Also hät sich e paar Joahr later jiemes hinjesotte on sich jedeit:

„Dat mot doch einfacher jonn“.

On sue is hä op die Idee jekomme, kleene Striepe uut Pappkarton te maake,
an ee Eng ene Kopp uut Schwe-afel draan temoa-le on op die Sie-e van dat Döske,
woa die Pappstriepe drin koa-me, en Rivfläche uut Phosphor te maake.

Jet later woare die Pappstriepe, weil die emmer ömknickete, dann uut Hoot.

On sue hät dä dann op ens dat Schpennke op de Welt jebreit.

Dat woa-re dann die Zünd- av Welthölzer.

(Dat bee dä Schwefel on dat Phosphor noch Antimonsulfid, Kaliumchlorat,
Paraffin on Ammoniumhydrogenphosphat koa-me, lott ich he einfach weg.)

Als et dann die Hölzkes met die ru-e Köppkes joav, hät man genau jeno-ame,
met Schpennkes die Spoen aanjemäk.

Spoen, - op deutsch Späne - send all emmer su-e kleene Stöckskes uut
Hoot jewäss, öm sich de Pief av dä Oa-ve in et Huus aan-temake.

Be dä Oave woa-ret dann su-e:

Te-iersch Papier aanmaake, dann Spoen, on dann ersch jru-et Holz,
Antrhazitko-al av Eierbriketts drop.

Wenn man sojett överhaupt krieje on betahle ku-es.

Dann koam die Pief draan:

Met ene Spooan woord dat Fü-er uut dä Oave vör dä Tabak in de Pief aanjemäk.

(Natürlich oane Eierbriketts on sojet.)

In die letzte Joahre, die wör henger os jebreit hant, sind die Schpennkes fast
uutjstorve. Et jiv koom noch richtije Schpennkes.

Met Jlöck krett man die noch als Werbejeschenk.

Maa, wann bruk man dann eijentlich noch Spennkes, met die man Vü-er
maake kann?

Dä Oa-ve van vröher is hüüt en Jaas- av Ölheizung; Ko-ake deet man met Strom ;
die Keerze aan dä Kreesboom sind en elektrische Leeterkett jeworde
on Rooke is sowieso onjesonk.

Dat Zänk Määrtes-Fü-er on dat Lateerke op dä Kirk-hoaf mäk man met
e Feuerzeuch aan.

(Av is dat op Platt e Vü-erzüschen?)

Et Schpennke, Deel twi-e

Wat kü-es ich noch övver Schpennkes vertälle?

Ich ne-äm aan, dat ör allemoale witt, wat e Schpennke es, ne?

Ich mot to-jeave, - dat ich, - so lang ich tröökdenke kann,

all emmer Ängs jehatt han vör Schpennkes.
Maa, net alleen vör die kleen Schpennkes; jrad vör jru-ete Schpenne han
ich all emmer Ängs jehad.
Jrad sue, wie de meeste Fraue Ängs hant vör Müüs.
Woher dat kütt, wiet ich net, ävver et isse su-e.

No ävver Quatsch op Sie, on van die richtige Schpennkes vertällt,
also die, met die - et mees - ru-e av bru-ene Köppkes:

Te-iersch ene Witz, be däm dat Schpennke en Hauptroll spillt:
Op Vasteloavend woll minne Bro-er, weil hä kee angersch Kostüm haad,
on hem nix angeres enveel, als Schpennke jon.
Op min Fro-are, wie dat dann jonn sollet, seiht hä damals:
„Janz einfach, ich jonn näck..... on oah-ne alles.....
ene ru-e Kopp krie ich von janz alleen.“

Wenn minne Vadder damals uut et Huus jing, schlooch hä emmer e Krüz
övver sich on seiht: „Han ich och alles? Pief, Tabak on Schpennkes?“

On dann joav et noch die Saak mit Tünnes on Schäl.
Die twie kennt ör doch allemoale, ne? Also:
Et is am rea-ne wie Sau on Tünnes fenk op de Stroat e Dös-ke mit
Schpennkes mit rue Köpp. Natürlich send die seeke-naat.
Hä versökk ee noa dat angere Schpennke, om dat dat brenne sollet.
Natürlich nix.
Bis op ens, dat allerletzte Schpennke janz onge brennet doch noch op.
Drop säht Tünnes: „Dat verwahr ich mich, dat deet et noch!“